

**ШҮҮХИЙН ЕРӨНХИЙ ЗӨВЛӨЛИЙН ШҮҮГЧ БУС ГИШҮҮНД
НЭР ДЭВШИГЧ М.АЛТАН-ОЧИР, С.ЭНХБААТАР НАРТАЙ ХИЙСЭН НЭР
ДЭВШИГЧИЙН СОНСГОЛЫН ТАЙЛАН**

Товч удирдамж: Улсын Их Хурлын холбогдох Байнгын хороо нь сонсголын тайланг бичихэд энэхүү загварыг ашиглана. Тайланг Улсын Их Хурлын албан ёсны цахим хуудаст байршуулах тул тайланд гэрийн хаяг, цахим шуудангийн хаяг, утасны дугаар зэрэг хүний хувийн нууцад хамаарах мэдээллийг, мөн нэр дэвшигчийн талаар ярилцлага өгсөн хүний нэр, түүнийг таних шинжийг бичихгүй.

Сонсгол, түүний үе шат, явуулсан ажиллагааны танилцуулга:

Монгол Улсын Шүүхийн тухай хуульд заасны дагуу Шүүхийн ерөнхий зөвлөлийн шүүгч бус гишүүнийг Улсын Их Хурал нээлттэйгээр нэр дэвшүүлж, сонгон шалгаруулсны үндсэн дээр томилгооны сонсгол хийж томилохоор заасан.

Монгол Улсын Их Хурлын чуулганы хуралдааны дэгийн тухай хуулийн 108 дугаар зүйлийн 108.1-т “Улсын Их Хурал Шүүхийн ерөнхий зөвлөл, Шүүхийн сахилгын хорооны гишүүнийг нэр дэвшүүлж, томилох, чөлөөлөх, огцруулах асуудлыг Монгол Улсын шүүхийн тухай хуульд заасан журмыг баримтлан хэлэлцэнэ.” гэж, Монгол Улсын Шүүхийн тухай хуулийн 76 дугаар зүйлийн 76.2-т “Ерөнхий зөвлөлийн бүрэлдэхүүнд ... бусад таван гишүүнийг нээлттэй сонгон шалгаруулалтын үндсэн дээр Улсын Их Хурал томилно.” гэж, 77 дугаар зүйлийн 77.5.2-т “энэ хуулийн 77.5.1-д заасны дагуу тайланг байршуулснаас хойш ажлын таван өдрийн дотор томилгооны сонсголын товыг зарлах” гэж, Нийтийн сонсголын тухай хуулийн 10 дугаар зүйлийн 10.1 дэх хэсэг, Монгол Улсын Их Хурлын хяналт шалгалтын тухай хуулийн 30.1.1.”...Шүүхийн ерөнхий зөвлөлийн шүүгч бус гишүүн... албан тушаалд томилуулахаар Улсын Их Хуралд санал болгосон нэр дэвшигчийн талаарх томилгооны сонсгол”, 30.3-т “Нэр дэвшигчийн сонсголыг Монгол Улсын Их Хурлын тухай хуульд заасан эрхлэх асуудлын хүрээнд холбогдох Байнгын хороо /цаашид "Байнгын хороо" гэх/ явуулна.”, 30.4-т “Нэр дэвшигчийн сонсгол явуулахад энэ хууль, Монгол Улсын Их Хурлын чуулганы хуралдааны дэгийн тухай хууль болон холбогдох бусад хууль тогтоомжийг баримтална.” гэж заасны дагуу нэр дэвшигчийн сонсголын үе шатыг баримтлан зохион байгууллаа.

1/Шүүхийн ерөнхий зөвлөлийн шүүгч бус гишүүнд нэр дэвшсэн Машлайн Алтан-Очир, Самданы Энхбаатар нар нь Хууль зүйн байнгын хорооны 2021 оны 3 дугаар сарын 10-ны өдрийн 6 дугаар тогтоолоор баталсан Шүүхийн ерөнхий зөвлөлийн болон Шүүхийн сахилгын хорооны шүүгч бус гишүүнийг сонгон шалгуулах журам болон “Нэр дэвших тухай хүсэлт”-ийн загварын дагуу материалаа бүрдүүлж, Байнгын хороонд ирүүлсэн болно.

Монгол Улсын шүүхийн тухай хуулийн 77 дугаар зүйлийн 77.2-т заасны дагуу Хууль зүйн байнгын хорооны 2024 оны 10 дугаар сарын 22-ны 05 дугаар тогтоолоор Шүүхийн ерөнхий зөвлөлийн шүүгч бус гишүүний сонгон шалгаруулах үүрэг бүхий ажлын хэсгийг Улсын Их Хурлын гишүүн Ц.Сандаг-Очир ахалж, Улсын Их Хурал дахь Монгол Ардын Намын бүлгийн Ажлын албаны дэд дарга О.Бат-Эрдэнэ, Улсын Их Хурал дахь Ардчилсан намын бүлгийн Хүний эрх, эрх зүйн бодлогын зөвлөх Х.Номингэрэл, Ерөнхийлөгчийн Тамгын газрын Хуулийн бодлогын газрын дарга Ж.Мөнхболд, Засгийн газрын хэрэг эрхлэх газрын дэд дарга Б.Батцэцэг, Хүний

эрхийн Үндэсний Комиссын гишүүн С.Дондов, Монголын хуульчдын холбооны Зөвлөлийн гишүүн Ц.Мөнхбат, Монголын өмгөөлөгчдийн холбооны Удирдах зөвлөлийн гишүүн З.Сүхбаатар, Хууль зүйн үндэсний хүрээлэнгийн захирал Х.Эрдэм-Ундрах, Монгол Улсын Их Сургуулийн Хууль зүйн сургуулийн захирал Б.Амарсанаа, Отгонтэнгэр их сургуулийн ахлах багш С.Эрдэнэболор нарын бүрэлдэхүүнтэй байгуулсан.

Ажлын хэсэг хууль, журмын дагуу сонгон шалгаруулалтын зарыг нийтэд мэдээлэх, нэр дэвших тухай хүсэлт, материал хүлээн авах, ажлын хэсэг байгуулах, нэр дэвшигчдээ бүртгэж, нийтэд мэдээлэх, нэр дэвшигчийн баримт бичгийг парламент.мн цахим хуудсанд байршуулах, нэр дэвшигчийн талаар мэдээлэл цуглуулах, бүрдүүлэх ажлын хэсгийн ярилцлага зохион байгуулах, нэр дэвшигчийг тодруулан Улсын Их Хуралд санал болгох гэсэн 8 үе шатны хүрээнд зохион байгуулж, С.Энхбаатар, М.Алтан-Очир нарыг Хууль зүйн байнгын хороонд танилцуулсан.

Хууль зүйн байнгын хороо нэр дэвшигчтэй хийх томилгооны сонголыг 2024 оны 12 дугаар сарын 11-ний өдөр зохион байгуулахаар тов тогтоосны дагуу сонголыг зохион байгуулсан.

3/Сонсголын бэлтгэл хангах хүрээнд:

- Нэр дэвшигчийн мэдээллийг Parliament.mn Улсын Их Хурлын цахим хуудаст байршуулсан.
- Сонсголын тов, хугацаа, сонсголд оролцогчдыг бүртгэх хуудсыг байршуулсан зарыг Улсын Их Хурлын цахим хуудас parliament.mn болон бусад сайтуудад 20 хоногийн хугацаанд давтамжтай байршуулж, оролцогч, ажиглагчийг бүртгэсэн.
- Мэдээллийн дагуу 3 оролцогч бүртгүүлснээс оролцогч Пүрэвдоржийн Бадамрагчаа, ажиглагч Пунцагийн Эрдэнэбаатар нар сонсголд оролцсон болно.

4/2024 оны 12 дугаар сарын 11-ний өдрийн 12:00 цагт Хууль зүйн байнгын хорооны гишүүдийн олонх хүрэлцэн ирснээр ирц бүрдэж, сонсголд Хууль зүйн байнгын хорооны гишүүн Дамдины Цогтбаатар, Жуковын Алдаржавхлан, Хүрэлбаатарын Баасанжаргал, Мөнхтөрийн Нарантуяа-Нара, Одсүрэнгийн Номинчимэг, Ухнаагийн Отгонбаяр, Пүрэвжавын Сайнзориг, Цэндийн Сандаг-Очир, Лхагвасүрэнгийн Соронзонболд, Хишигдэмбэрэлийн Тэмүүжин, Баттөмөрийн Энхбаяр, Даваагийн Цогтбаатар, Сүхбаатарын Эрдэнэболд нарын 13 гишүүд оролцсон.

Шүүхийн ерөнхий зөвлөлийн шүүгч бус гишүүнд нэр дэвшигч Машлайн Алтан-Очир, Самданы Энхбаатар нарын товч танилцуулгыг Улсын Их Хурлын гишүүн, сонгон шалгаруулах ажлын хэсгийн ахлагч **Цэндийн Сандаг-Очир** танилцуулж, нэр дэвшигч нар Шүүхийн ерөнхий зөвлөлийн шүүгч бус гишүүнд нэр дэвших болсон үндэслэл, эзэмшсэн боловсрол, ажлын туршлагаа танилцуулсан.

Мөн Нэр дэвшигч Машлайн Алтан-Очирын талаарх сонгон шалгаруулах ажлын хэсгийн тайланг Ажлын хэсгийн гишүүн, илтгэгч гишүүн Хүрэлбаатарын Эрдэм-Ундрах, нэр дэвшигч Самданы Энхбаатарын талаарх сонгон шалгаруулах ажлын хэсгийн тайланг Ажлын хэсгийн гишүүн, илтгэгч гишүүн Оросоогийн Бат-Эрдэнэ танилцуулсан.

/Нэр дэвшигч нар Шүүхийн ерөнхий зөвлөлийн шүүгч бус гишүүнд нэр дэвших болсон үндэслэл, эзэмшсэн боловсрол, ажлын туршлагаа танилцуулсан талаар:

6.1.Нэр дэвшигч Машлайн Алтан-Очир:

- Шүүхийн бие даасан байдлын гол баталгаа болсон шүүхийн байрны асуудлыг шийдвэрлэх талаар: Өнөөдрийн байдлаар Монгол Улсад 117 шүүх, 42 тамгын газар 42 байранд үйл ажиллагаа явуулж байгаагаас 36 стандартын шаардлага хангахгүй байранд, 4 шүүх прокурортой хамт, мөн хэд хэдэн шүүх орон нутгийн өмчийн байранд түрээсээр байрлаж байгаа нь шүүхийн бие даасан байдлын гол баталгааг хангахад зайлшгүй хийгдэх шаардлагатай ажил гэж;
- Шүүхийн цахимжилтын талаар: Хууль эрх зүйн орчныг боловсронгуй болгох, харилцан ажилладаг байгууллагуудтай мэдээлэл солилцдог нэгдсэн программ хангамжийг бий болгох, орчин үеийн технологийн хөгжил бүхий тоног төхөөрөмж нэвтрүүлэх, аюулгүй байдлыг хангах, шүүгч болон шүүхийн захиргааны ажилтны цахим ур чадварыг хөгжүүлэхэд анхаарч ажиллана гэж;
- Шүүгчийн ажлын ачааллыг тэнцвэржүүлэх талаар: Улсын хэмжээнд 724 шүүгч ажиллахаас Улсын Дээд шүүхээс бусад шүүхэд 200 гаруй шүүгчийн орон тоо дутуу, 2023 онд нэг шүүгч 604 хэрэг шийдвэрлэсэн гэсэн статистик мэдээнээс үзвэл сард 50 хэрэг шийдвэрлэж байгаа нь ажлын ачаалал хэт их байгааг харуулж байгаа учир шүүгчийн ажлын ачааллыг тэнцвэржүүлэх шаардлагатай гэж;
- Шүүхийн захиргааны ажилтны ажлын ачааллыг тэнцвэржүүлэх, тогтвор суурьшилтай ажиллах орчин, нөхцөлийг бүрдүүлэх талаар: 2023 онд шүүхийн захиргааны ажилтан 367 гарч, 422 ажилд орсон гэсэн мэдээнээс үзвэл шүүхийн захиргааны ажилтны хүний нөөцийн хөдөлгөөн их байгааг харуулж байгаа бөгөөд энэ нь шүүхийн захиргааны ажилтны ажлын ачаалал их, сурч боловсрох, өөрийгөө хөгжүүлэх боломж бага, ажиллах орчин нөхцөл бүрэн хангагдаагүйг харуулж байгаа гэж;
- Дээрх асуудлуудын гол зангилаа нь эдгээртэй холбоотой цалин, төсөв санхүүгийн асуудал дутмаг, бүрэн шийдвэрлэгдээгүй байдлыг харуулж байх ба нарийн судалгааны үндсэн дээр тооцоолон гаргаж холбогдох эрх бүхий байгууллагад уламжлан шийдвэрлүүлэх зэрэг үйл ажиллагаанд анхаарлаа хандуулан, шүүхийн тухай хууль тогтоомжийг мөрдлөг болгон ажиллах болно гэж танилцууллаа.

Нэр дэвшигч **М.Алтан-Очир** болон ажлын хэсгийн тайлантай холбогдуулан Улсын Их Хурлын гишүүн С.Эрдэнэболд, Х.Баасанжаргал, О.Номинчимэг, У.Отгонбаяр, Ж.Алдаржавхлан, Д.Цогтбаатар болон оролцогч П.Бадамрагчаа нар асуулт асууж, хариулт авсан болно. Тухайлбал:

Улсын Их Хурлын гишүүн С.Эрдэнэболд: Шүүхийн нэр хүнд буурч, олон нийтийн итгэл алдарч байгаа асуудалд нэр дэвшигчийн байр суурь болон иргэдийн итгэлийг сэргээхийн тулд ямар бодлого, арга хэмжээг авч хэрэгжүүлэх талаар, Шүүхийн шийдвэртэй холбоотой ташаа мэдээлэл олон нийтийн дунд тархаж, шүүхийн үйл ажиллагаанд сөрөг нөлөө үзүүлж байгааг хэрхэн зохицуулах талаар;

Улсын Их Хурлын гишүүн Х.Баасанжаргал: Шүүхийн шинэчлэлийн хүрээнд хуулийн хэрэгжилтийн одоогийн нөхцөл байдлыг хөндөж, үүнд ямар дүгнэлт хийж байгаа талаар, шүүхийн бүтэц, зохион байгуулалтын үр дүнг сайжруулах чиглэлээр ямар ажлуудыг хийх, мөн шүүгчдийн мэргэжлийн ур чадвар, ёс зүй, болон хүний

нөөцийн чадавхыг сайжруулахад анхаарах асуудлын талаар, иргэдэд шүүхийн үйл ажиллагаа хэрхэн ойр, хүртээмжтэй байлгах талаар;

Улсын Их Хурлын гишүүн О.Номинчимэг: Шүүхийн хараат бус байдал, хуулийн хүрээнд үйл ажиллагаагаа явуулах нөхцөлийг хэрхэн хангах талаар, иргэд шүүхээс шударга ёсыг мэдрэх, эрх ашгаа хамгаалуулах боломжийг хэрхэн бүрдүүлж байгаа талаар, шүүхийн шинэтгэлийн ажлын хэрэгжилтийн явц, үр дүнг сайжруулах төлөвлөгөөний талаар;

Улсын Их Хурлын гишүүн У.Отгонбаяр: Шүүхийн хөгжлийн бодлого, цаашид урт хугацааны тогтвортой бодлогыг хэрэгжүүлэх шаардлагын талаар;

Улсын Их Хурлын гишүүн Ж.Алдаржавхлан: Нэр дэвшигчийн шүүхтэй холбоотой хамаатан садан байгаа эсэх, мөн шүүхийн системд “хонгилын шүүх” гэж нэрлэгддэг шударга бус тогтолцоо байдаг эсэх талаар;

Оролцогч П.Бадамрагчаа: Нэр дэвших болсон үндэслэл болон хууль зүйн өндөр мэргэшилтэй эсэхийг хэрхэн ойлгож байгаа талаар, мөн нэр дэвшигч шүүх хуралдаанд оролцож байсан эсэх, шүүхийн ажиллагааны талаарх мэдлэг, туршлагын талаар, шүүгчийн хараат бус байдалд учирч буй томоохон эрсдэлүүд, тэдгээрийг шийдвэрлэхийн тулд ямар арга хэмжээ авах саналтай байгаа талаар, иргэн, захиргааны шүүхийн шийдвэрийн биелэлт хангалтгүй байгааг онцолж, энэ асуудлыг хэрхэн шийдвэрлэх, Шүүхийн ерөнхий зөвлөл ямар байр суурь баримтлах ёстой талаар тодруулсан.

6.2.Нэр дэвшигч Самданы Энхбаатар:

- Улсын Их Хурлын 2024 оны 04 дүгээр сарын 25-ны өдрийн 33 дугаар тогтоолоор “Монгол улсын Шүүх эрх мэдлийн хөгжлийн бодлого батлах тухай” Улсын Их Хурлын тогтоол батлагдсан. Шүүх эрх мэдлийн бодлогын баримт бичигтэй болсноор 10 жилийн алсын хараагаа харж нээлттэй ил тод байдлыг хангах, зорилт үр дүн бүрийн ард хэмжих шалгуур болон санхүүжилтийг тавьсан нь цаасан дээрх бус бодит биелэлтийг хангах хөшүүрэг болсон гэж;
- Шүүх эрх мэдлийн хүрээнд нэн тэргүүнд тавигдах иргэний эрхийг бүх шатны шүүх ажиллагаанд баталгаатай эдлүүлж, үйл ажиллагааны нээлттэй, ил тод байдлыг дээшлүүлэх, шүүгчийн хараат бус, шүүхийн бие даасан байдлыг хангахад бүрэн анхаарч, хариуцлагатай шүүхийг төлөвшүүлэх, өөрийн туршлагад тулгуурлан шүүх эрх мэдлийн байгууллагын захиргааны менежментийг орчин үеийн шаардлагад нийцүүлэх, шүүхийн үйлчилгээний стандартыг төлөвшүүлэх бэхжүүлэх талаар тууштай зарчим баримталж ажиллана гэж;
- Иргэнд ээлтэй, нээлттэй шүүхийн чухал алхам болсон цахимжуулалт, цахим платформд суурилсан шийдлүүд, түүний дотор тоног төхөөрөмжийн шинэчлэлд анхаарлаа хандуулна гэж;
- Шүүхийн бие даасан байдлыг хангах, төрийн үйлчилгээг чирэгдэлгүй шуурхай хүргэхэд нэн шаардлагатай шүүхийн байрны асуудал олон жил яригдаж шийдвэрлэгдэхгүй ирсэн, одоогийн байдлаар 10 шүүх огт байргүй байгаа ба бүсчилсэн байдлаар байрны асуудлыг 4 үе шаттайгаар хэрэгжүүлэхээр Шүүхийн ерөнхий зөвлөлөөс төлөвлөж байгааг дэмжин ажиллана гэж;
- Шүүхийн ерөнхий зөвлөлийн албан ёсны цахим сайтад гарсан статистик судалгаагаар 2022 онд 111 мянга, 2023 онд 118 мянган хэрэг дунджаар шүүхээр шийдвэрлэгдсэн ба үүний 80 хувь анхан шатны шүүхээр

шийдвэрлэгдсэн байна. Иймд шүүхийн ачаалал тэнцвэрт байдалд анхаарлаа хандуулах, суурь судалгаануудыг хийх шаардлагатай гэж;

- Дээр дурдсан асуудлын хүрээнд төрийн ажлын туршлага, дотоод, гадаадын өндөр хөгжилтэй орны сургуульд сурсан мэдлэг, чадвартаа тулгуурлан ёс зүйн өндөр сахилга баттай байж, Үндсэн хууль, Шүүхийн тухай хууль, бусад хэм хэмжээний хүрээнд ажил үүргээ гүйцэтгэж, хариуцсан салбар чиглэлээ сайжруулахад өөрийн хувь нэмрийг оруулахаар хичээн ажиллах болно гэж танилцуулсан.

Нэр дэвшигч **С.Энхбаатар** болон ажлын хэсгийн тайлантай холбогдуулан Улсын Их Хурлын гишүүн **С.Эрдэнэболд**, **Х.Баасанжаргал**, **О.Номинчимэг**, **Л.Соронзонболд**, **Ц.Сандаг-Очир** болон оролцогч **П.Бадамрагчаа** нар асуулт асууж, хариулт авсан.

Улсын Их Хурлын гишүүн С.Эрдэнэболд: Шүүхийн ерөнхий зөвлөлийн гишүүнээр сонгогдсон тохиолдолд хамгийн чухал анхаарч ажиллах асуудал болон нэр дэвшсэн албан тушаалын гол зорилт, үйл ажиллагааны чиглэлийн талаар;

Улсын Их Хурлын гишүүн Х.Баасанжаргал: Шүүхийн үйл ажиллагааг ил тод, ойлгомжтой болгоход ямар гарц шийдэл байгаа талаар, цаашид хэрэгжүүлэхээр төлөвлөж байгаа ажлын талаар;

Улсын Их Хурлын гишүүн О.Номинчимэг: 2023 оны шүүхийн индексэд шүүгчийн ёс зүй сайжирч байгаа ч шүүхэд итгэх олон нийтийн итгэл буурч байгааг хэрхэн сайжруулах талаар, шүүхийн үйл ажиллагааг цахимжуулахад анхаарах шийдлийн талаар;

Улсын Их Хурлын гишүүн Л.Соронзонболд: Шүүхийн ерөнхий зөвлөлийн зүгээс шүүхийн цахимжуулалтын талаар анхаарах асуудал, хийж хэрэгжүүлэх ажлын талаар;

Оролцогч П.Бадамрагчаа: Нэр дэвших болсон үндэслэл болон хууль зүйн өндөр мэргэшилтэй эсэхийг хэрхэн ойлгож байгаа талаар, мөн нэр дэвшигч шүүх хуралдаанд оролцож байсан эсэх, шүүхийн ажиллагааны талаарх мэдлэг, туршлагын талаар, шүүгчийн хараат бус байдалд учирч буй томоохон эрсдэлүүд, тэдгээрийг шийдвэрлэхийн тулд ямар арга хэмжээ авах саналтай талаар тодруулж, хариулт авсан болно.

/Нэр дэвшигчээс асуулт асууж, хариулт авсны дараа Улсын Их Хурлын гишүүн **Х.Баасанжаргал**, **Ц.Сандаг-Очир**, **Х.Тэмүүжин**, оролцогч **П.Бадамрагчаа** нар үг хэлсэн болно.

Сонсголыг Хууль зүйн байнгын хорооны дарга **Дамдины Цогтбаатар** хааж үг хэлсэн болно.


/Сонсголын үйл явцыг нэгтгэн дүгнэх нь

Шүүхийн ерөнхий зөвлөлийн шүүгч бус гишүүнийг Монгол Улсын Шүүхийн тухай хууль, Монгол Улсын Их Хурлын хяналт шалгалтын тухай хууль, Монгол Улсын Их Хурлын чуулганы хуралдааны дэгийн тухай хууль, Нийтийн сонсголын тухай хуульд заасны дагуу Хууль зүйн байнгын хороо нэр дэвшигчийн сонсголыг 2024 оны 12 дугаар сарын 11-ний өдөр зохион байгууллаа.

Монгол Улсын Их Хурлын чуулганы хуралдааны дэгийн тухай хуулийн 133 дугаар зүйлд заасны дагуу сонголд оролцсон гишүүд нэр дэвшигчийн сонголт явуулснаас хойш ажлын 2 өдрийн дотор буюу 2024 оны 12 дугаар сарын 13-ны өдөр хаалттай хуралдаж, хуралдаанд оролцсон гишүүдийн олонхын саналаар сонголын тайланг гаргасан бөгөөд нэр дэвшигч М.Алтан-Очир, С.Энхбаатар нарыг хуульд заасан болзол, шалгуурыг хангаж байгаа тул Хууль зүйн байнгын хорооны хуралдаанаар эцэслэн шийдвэрлэх нь зүйтэй гэж үзлээ.

СОНГОЛ ДАРГАЛАГЧ:

ХУУЛЬ ЗҮЙН БАЙНГЫН
ХОРООНЫ ДАРГА



Д.ЦОГТБААТАР

ТАНИЛЦУУЛГА

/Шүүхийн ерөнхий зөвлөлийн шүүгч бус гишүүнд нэр дэвшигч/



- 1.Овог нэр:** Самданы Энхбаатар
- 2.Хэзээ, хаана төрсөн:** 1977 онд Төв аймагт төрсөн
- 3.Нас, хүйс:** 47 настай, эрэгтэй

4.Хэзээ, хаана, ямар сургууль төгссөн мэргэжил, эрдмийн зэрэг, цол:

- 1999 он МУИС, Хууль зүйн сургууль, эрх зүйч /Бакалавр/
- 2007 он МУИС, Хууль зүйн сургууль, Хууль зүйн магистр /Магистр/
- 2015 он Сидней, Австрали, Макьюри Их Сургууль, Олон улсын харилцааны магистр /Магистр/

5. Ажилласан байдал:

- 1999.07-2002.11 сард Гадаадын хөрөнгө оруулалт, гадаад худалдааны агентлагт хуулийн мэргэжилтэн
- 2005.11-2008.03 сард Гадаадын хөрөнгө оруулалт, гадаад худалдааны агентлагт мэргэжилтэн, Тамгийн хэлтсийн дарга
- 2008.03-2009.04 сард Иргэний бүртгэл, мэдээллийн улсын төвийн Дэд дарга
- 2009.04-2012.02 сард Улсын бүртгэлийн ерөнхий газрын Орлогч дарга
- 2012.02-03 сард Засгийн газрын хэрэг эрхлэх газарт Референт
- 2012.03-2013.01 сард Шударга өрсөлдөөн, хэрэглэгчийн төлөө газарт Орон тооны гишүүн, дэд дарга
- 2015.04-2016.10 сард “Соёмбо легал партнерс” ХХН-д Зөвлөх
- 2016.10-2018.06 сард “Улаанбаатар цахилгаан түгээх сүлжээ” ТӨХК-ийн Дэд захирал
- 2018.06 сараас Архивын ерөнхий газрын дарга, Архив, албан хэрэг хөтлөлтийн хяналтын улсын ерөнхий байцаагч

---ooOoo---

ТАНИЛЦУУЛГА

/Шүүхийн ерөнхий зөвлөлийн шүүгч бус гишүүнд нэр дэвшигч/



- 1.Овог нэр: Машлайн Алтан-Очир
- 2.Хэзээ, хаана төрсөн: 1974 онд Ховд аймагт төрсөн
- 3.Нас, хүйс: 50 настай, эрэгтэй

4. Хэзээ, хаана, ямар сургууль төгссөн мэргэжил, эрдмийн зэрэг, цол:

- 1999 он Цагдаагийн дээд сургууль, эрх зүйч /Бакалавр/
- 2003 он Тагнуулийн ерөнхий газрын дээд сургууль, Аюулгүй байдлын магистр /Магистр/
- 2012 он Жонон дээд сургууль, эдийн засагч /Бакалавр/
- 2014 он Москва, ОХУ, ДХЯ-ны Удирдлагын академи, Удирдахуйн менежерийн магистр /Магистр/
- 2017 он Дотоод хэргийн их сургууль, Гэмт явдал судлалын докторын хөтөлбөр
- 2019 он Дотоод хэргийн их сургууль, Хууль зүйн доктор

5. Ажилласан байдал:

- 1993-1995 онд Хорих байгууллагуудын удирдах газрын Амгалан дахь хорих ангид хянагч
- 1999.06-10 сард ШШБЕГ-ын Хорих ял эдлүүлэх газарт ахлах ажилтан
- 1999.10-2000 онд ШШБЕГ-ын Хорих ял эдлүүлэх газарт ахлах төлөөлөгч
- 2000.01-09 сард Барилгын материалын ашиглалтын өмнөх захиргаа буюу 409 дүгээр ангид ахлах төлөөлөгч
- 2000-2003 онд ШШБЕГ-ын Өвөрхангай аймгийн Хархорин сум дахь 423 дугаар ангид дэд дарга
- 2003-2004 онд ШШГЕГ-ын 401 дүгээр ангийн Гүйцэтгэх ажил харуул хамгаалалт эрхэлсэн дэд дарга
- 2004-2012 онд ШШГЕГ-ын Хэнтий аймаг дахь Шүүхийн шийдвэр гүйцэтгэх албаны дарга
- 2015.02-04 сард ШШГЕГ-ын хорих 409 дүгээр ангийн дарга
- 2015.04-08 сард ШШГЕГ-ын Амгалан дахь хорих 421 дугаар ангийн дарга
- 2015.08-2017.07 сард ШШГЕГ-ын Захиргааны удирдлагын газрын дарга
- 2017.07-12 сард ШШГЕГ-ын Тэргүүн дэд дарга
- 2018-2021 онд ШШГЕГ-ын Хяналт шалгалтын газрын дарга
- 2021-2022 онд ШШГЕГ-ын Хяналт шалгалт аюулгүй байдлын газрын дарга
- 2022.11- 2023.04 сард ШШГЕГ-ын Шийдвэр гүйцэтгэх албанд хэлтсийн дарга
- 2023.04-08 сард ШШГЕГ-ын Сургалтын төвд Менежер
- 2023.08-2024.04 сард Монголын төмөр замд Захиргааны удирдлагын газрын дарга